

快

園

詩

話

快園詩話卷五

江寧 凌霄 芝泉

襄郎感舊篇客揚州感夢作載溟鵬集繪圖紀事題咏
極多不能脩錄行當另梓專集汪香山作傳甚詳傳曰
顧蓮姑行三竹山世家女也年十七依兄而居白蓮教
之亂居遭焚兄受害女遂被虜有某公子者少俊多才
爲制軍高弟值大帥督師襄郎間制軍薦佐帷幙時房
邑令以糧餉挪應軍需蓋受大帥顧指而未白制軍者
制軍牒帥委查帥思可於制軍前緩頰者非公子不可
乃使王司馬往查而以公子偕行四郊多壘復令李都

閩率軍三百爲衛道途值兵燹之餘民竄市徙住宿恒資於行帳經房竹之交昏暮將雨得空邨因投止焉適孫總戎遂寇甫過故荒涼倍於他境及入夜雨大作邨後竹深林密忽有哭聲漸高漸衆聞者初驚寇至繼疑鬼號探之知難民爲寇所虜棄於空邨者因避兵林內夜雨而號泣也公子命以行帳蔽之且賑以粥比曉按之則皆年少婦女計百三十五人公子謂王李二公曰是皆蒼生流離道路不死寇必死飢矣盍拯諸僉曰此守土者之事與焉恐獲咎公子曰是何言哉百十生靈忍視其死歟請挈之行有譴當獨任於是撥兵護之移

置房邑之尼庵邑宰白公子曰流亡婦女多且屢矣凡民之無妻者許繳三金卽准給領請照往例行之第軍書旁午分理莫及仍乞司馬及公子代治其事乃遣吏一役二以供使令先以婦女年貌編冊婦前女後女中之韶秀者十三人附於冊尾其居末尤文且媚者則蓮姑也造冊之意蓋欲留待可偶者匹之甫出示具領紛至率皆鵲衣鵲面無一非惡狀者按冊之先後給之彼婦女者莫不卧地哀號皆須負曳始去閱五日公子司馬必詣庵稽查一次其未去者悉聞前狀色懼音哀不可聞覩領漸盡將及十三人公子惻然曰彩鳳隨鴉古

今同慨況名花落溷乎節幕賓朋稱盛必有憐而拯之者乃捐金貯庫屬邑宰止領而致書節署宰疑公子之有意也欲結公子歡爲諸女製衣履脩器用食則易粥而飯易蔬而肴矣且傭姬伴之由是庵尼伴姬爭相慶曰苟非苦至焉得甘回出地獄升天堂咫尺間耳諸女聞之舉欣欣舒顏竊計人衆難免他贈雖縈得失之念然自幸較前去者已判雲泥矣每公子臨稽諸女容羞心喜咸有嬌鳥依人之態間通語言多士大夫後而精翰墨工刺繡嫺而多韻麗而不佻則以蓮姑爲最值蓮姑因病公子偶隔牖視之且召醫治其疾羣遂譁爲福

星尼以長幡供佛蓮姑爲之徧繡蓮花并楷書佛經於
上故老尼尤德之未幾制軍覆書至謂幕中無願留者
仍著照常發領示出卽撤諸女服用食則依然易飯而
粥矣發領之際慘痛倍於疇昔公子不忍見交司馬獨
理之佛誕日公子進香於庵蓮姑膝行而前泣且訴曰
自遭寇虜已分溝壑得公子拯救本屬餘生茲同伴已
盡將次及奴奴思身爲宦裔頗習詩書今骨肉已無家
產已燬伶仃弱女苟活奚爲不卽死者無以報公子恩
耳豈肯辱身廝卒耶情願削髮空門伴老尼以終藉可
禮佛祝公子長生不可則寧死公子之前公子曰可否

問諸老尼尼曰哀哉公子見尼中有此少艾乎公子忍令此少艾而使其爲尼乎庵居兵亂之境保無強暴者窺視而剽掠之乎以公子之力熒熒一女終竟不能生之乎此老尼所未解亦老尼所不忍聞者公子不能決謀於司馬司馬曰多人則難一人則易盍寄托邑署軍竣之日攜以南旋自留之可擇人而配之亦可公子曰憐而生之余本心也若功名未立遽納難女人其謂我何寄托邑署心莫自矣寧遣詣節署去留聽制軍主之可也公子將旋大營以女屬邑宰賃舟車遣婢姬送之鄂渚且上書制軍制軍曰曩書來以人數多故未謀幕

友而遽覆茲一人之來何礙令安置內署善視之節署
多閨秀見女皆憐且愛與之談論輒合爭解衣飾以贈
處以繡閨侍以小鬟居然富貴中人矣取公子所遺衣
箱書笥交付之女整理悉如法每月寄衣更換必以紅
絲繡連環如意各狀於衣領之背公子得衣不知製自
女手也有蔡老垢仙者以術數游吳楚間持顯者書來
謁制軍下榻節署聞女美揚言曰竹山舊游地也居處
之鄰卽女家也女受聘之夫素所識也今貿易閩中音
問固常通也次年春公子自營返署蔡老復以爲言公
子曰尙將擇人而配況有夫乎當設法歸之翌日制軍

將有辰州之行蔡晏見曰現將之閩某公子以顧女之
夫在閩託攜而歸之敢告辭適公子趨過制軍呼曰蔡
老言爾將以顧女歸其夫有諸公子行且荅曰有之制
軍謂蔡曰誠善舉也曷可相累餽贐外以女故當增百
金召閹者面諭之次晨制軍起行後蔡亦倣裝向閹者
索金兼顧女焉閹者傳言內署促女行女始覺舉署皆
驚以制軍命無敢留者扶女出堂內眷爭送之女曰他
無所言惟求公子一見公子至女拜於地曰一載再生
公子恩也青衣畢世願斯足矣閩行何爲若果昔日父
母有命奴年非稚寧未之聞耶料此行亦與虜於寇辱

於廝卒等耳安望生乎事至此不得不忍恥一言奴小
名蓮姑乞公子書於素絹庶他日孤魂有歸爲結草銜
環之地言已一慟幾絕聞者莫不揮淚婢媼環立數十
皆嗚咽失聲公子亦掩面而出女竟爲蔡老挾之登舟
而去是秋王司馬賃栢姓舟由沌陽之豫章經道士洑
風斜水旋不得前命維舟於山左舟人婦呼曰不可寧
迴帆轉柁另覓泊處紆程所不惜也司馬異而問之對
曰蓋有故也春間督轅傳送蔡姓東下蔡挈一顧姓女
云是新姬購自軍前者女則自稱爲某公子侍兒被其
拐騙者曰惟飲泣蔡命婦伴於後艙勸慰之一夕微月

舟泊茲山蔡具酒肴呼女同飲女不應執於外艚撻之
女忽改容謝罪捧壺侑觴蔡旣醉女竟越窗赴水死今
過其地心猶悚然故不敢泊也司馬知卽房邑之難女
也太息久之再越歲余遇司馬於武昌話顧女事相與
惋歎然終疑此女旣歸節署之中何以又入蔡姓之手
反覆懸揣莫明其故於心歉焉冬杪移寓漢皋與張幕
府鄰張節署中舊人也叩之自女之來至女之去始得
其詳余亦以女赴水事轉告幕府撫然曰紅顏薄命竟
至是耶天旣賦女以貌與才生於名門幸矣而一旦家
破兄亡身爲寇虜待斃道路何其慘也旣得公子拯於

難上書將脫而拔之則又幸矣及不獲脫求爲尼亦不
得又何阨歟比至送入節署則出泥塗而貯金屋矣不
可謂不幸也乃復遭奸人之騙卒至感恩莫報銜恨捐
生玉瘞江流珠沈魚腹傷哉惜哉然其自惜宦裔不苟
活以辱身欲醉奸人能改容而勸酒眷念酬恩從容赴
死其智慧節槩大有不可及者烏可使與草木同朽先
生悉其顛末請爲文以彰之余雖不文重幕府之屬悲
女之遇爰爲立傳并將詳誌制軍大帥公子姓氏幕府
曰大帥統師不能止寇匪之虜掠制軍察吏不能辨術
士之奸邪皆非全德至公子以惻隱之心成懊恨之事

知者謂其不得已不知者以爲不終德也盡隱諸故是
傳於大帥制軍公子皆未載其姓氏云

題辭以姚古鳳倣騷體大招最古

五古以張老蘊喬雲客胡丙皋袁嘯竹者最佳

倣感舊篇者繆子嘉曰擁書坐守閒庭院有客來修士
相見示我襄陽感舊圖圖中細讀蓮姑傳蓮姑顧姓竹
山居十七年華愛讀書不幸四郊羣盜起身遭虜掠火
焚廬同時難女人無數被賊鞭驅上長路大兵掩至賊
奔逃餘生暫向空村住去住茫茫正苦哀又聞此處有
兵來恰當村後多林木借作羣娃避債臺遙知兵在村

中宿夜黑林深暫潛伏凍餒難熬雨又淋不禁百口同
聲哭百口同聲將士驚片時鎗火照山明布帷張徧容
投足湯粥施來得再生詰朝移入山城裡大士龕前命
棲止食指多貽邑宰憂蓮姑獨得庵尼喜姿容絕世性
元靈日日長幡寫佛經那信空門依未久元戎有令嫁
娉婷傳聞女伴頻頻去盡屬鴛鴦配雞鶩漸將及女女
心悲柔腸百轉無門訴帷幄何人掌運籌翩翩公子作
參謀憐才義把蛾眉贖送入侯門百不憂侯門舊住參
謀地更換征衣交女寄襟上都將蘭麝薰領邊密繡絨
絲記遠信私從侍婢探芳心終歲繫征驂明知連理枝

無分便作旁生蔗亦甘王孫歸也人爭賀引避深房嬌
且懦穩擬紅鸞照命臨何期白虎當頭坐受欺宰相太
模稜公子恩恩語欠斟兩錯成全奸宄計三生癡絕女
兒心明珠投與篋條叟閭海無家何處走臨歧哽咽問
恩人翦紙招魂君肯否地獄天堂頃刻分哀鳴匍匐淚
紛紛一言不發寧拋妾九死無辭定報君扁舟挾去緣
江下中途妄想星橋駕拒命頻將綵鳳答守貞忍受山
膏罵改容勸酒忽殷勤醉倒奸人便脫身十八年來塵
劫滿抱持完璧焚江濱江濱人去誰相問惟憑舟子傳
因信灑淚爭憐帝女冤負心都向王昌恨那知不斷是

情根卅水重來夢裡魂夢醒吟成淒楚句至今留得畫
圖存平生我亦鍾情者讀未終篇淚盈把惜玉新詞伏
枕吟聯珠小字挑燈寫願女全銷恨邈綿願君休忘舊
因緣楚江水接秦淮水再世重開並蒂蓮

七古佳者吳山尊學士肅曰上馬持槊下馬檄軍中有
婦鼓不寂英雄兒女皆詩情雨中憐此名花泣花開花
落誰爲之竟死奸人不死賊羅敷有夫當還璧莫怪使
君不終德平安不報訴此箇幽夢猶能辨顏色詩人爭
弔顧三娘佳句足酬精衛石三生緣重與千秋小影嘉
名均不減此外則黃春谷蔣秋竹朱葑齋徐生庵閔玉

樵夏紅舫石澧原李瘦仙沈閨仙黃孺子劉小愚閨秀
熊澹仙者佳

五律佳者汪劍潭太守端光曰將軍開毳幕笳鼓送紅
粧爲道閩山好隨人歸故鄉早知無宋玉悔不嫁文鴛
似有化儻感聲聲向客床此外則黃花耘本騏閨春樊
志壇汪智泉茂醇李蓮溪新林龔吉人慶者佳

快園詩話卷六

江亭 凌霄 芝泉

題感舊圖七律佳者胡橘洲啟榮曰明說羅敷自有夫
殷勤付託豈爲愚逾時悔鑄牙軍錯始念期還合浦珠
妾命到頭同紙薄君心如月與人殊寄衣冑負當年意
感慨臨池賦此圖李白樓曰默默芳心歸國士申申謔
詠誤佳人姜五橋曰一錯已成名士恨多情翻累美人
孤李琴軒曰自此珠難還合浦那能笛再唱迴波徐竹
蘚曰驚沙落日悲千里瓊樹荒原見一枝李元朗曰關
山月冷鳴鵲烟雨魂歸罷鼓鼙湯少仙曰縱使梅花

心冷澹那堪柳絮意纏綿此外則鄒漱石蔣詠春黃孟
騰王藻莊史叔惠汪玉屏汪筠溪歐陽棣之保印卿洪
介石沈素芬閨秀張茹茶者佳

五排范藻仙三十韻佳

五截佳者鄭紫硯鑿胡淞亭治道士王赤城餐霞

六截佳者保鳳墀金臚安南閉阮其心恭

七截朱白泉爾賡額曰大千世界苦茫茫戰骨如山意
可傷那得紅粧頻入夢枕邊猶濕淚痕長張晴川曰可
堪再展巾箱看一縷紅絲萬縷愁許春卿曰侯門似海
身難寄一別侯門海更深李華白曰不是難將離恨補

本來生傍女媧山沈酌亭曰浪說重來結舊盟多情公
子枉鍾情當時一念能持久何必韋家說再生汪逸園
曰不爲相思尋入夢報恩兩字更憐卿鄒耳山曰百計
難爭花命薄纔離駭浪又驚沙周西岑曰可憐笳鼓驚
聞慣又被晨鐘怯小魂姜種蘭曰亭亭夢裡依稀見是
我憐卿轉累卿汪綠野曰平生多恨復多癡但見名花
要護持展卷細看看又想共君癡恨到何時周實夫曰
一瓣零紅秋水渺依依惆悵到何年談念堂曰好把迴
腸比流水邦江曲曲到湘波江鄭堂曰一箇女郎留不
得笑他磨盾說從戎顧陔吟曰一事九原堪瞑目入江

猶是女兒身汪春潯曰莫笑相逢成畫餅英雄兒女已
千秋徐雪門曰不死么瘠死奸賊居然兒女是英雄金
鍊蕉曰欲托菩提棲未穩佛心偏也不多情徐珠浦曰
美人終不忌知己千里魂猶入夢來洪蕉畦曰莫言薄
福紅顏命也是郎情太不堅徐蘭浦曰料得沌陽江上
水不應阻向夢中尋江立亭曰一語問君行篋裡還留
幾領舊征衣吳竹亭曰藥師縱有封侯志紅拂何妨伴
一生江笠人曰誰使相逢誰拆散賊兵不恨恨奸人石
蔥佩曰聽到了了臨別語將軍如夢美人醒孟貞友曰
紅顏無限傷心處夢裡相逢訴未明僧種香曰倘許依

尼皈淨域省教散作雨花飛皆佳此外佳者汪惕齋許
季青仲雲浦鈕非石江蔓園楊子堅張義河朱石甫楊
蓮渚于秋渚陳書農吳野渡黃秋平江南星江遠山金
鶴船符雨岩康瑞伯沐月江謙味堂顧千里王鶴汀李
能白許蔬庵張筱軒程書之旋三橋姜春舫素冶山黃
小秋程蕤香吳萍波汪子山吳蘭墀沈東岩僧曇亭閨
秀熊澹仙

詩餘佳者吳穀人祭酒錫麒金縷曲曰萬帳沉兵氣聽
吹來鶯啼燕咤夜寒如水中青娥情尤苦閱徧華嚴
劫裡怕重墮者般身世幸賴書生毛錐健護名花才得

罡風避論此段信知已天涯誰是羅敷婿甚闌干銀河
近處密雲先蔽憑著鴛媒催歸急只說兒家故里惹斷
夢淒迷無際明月二分今宵照唱秋墳一縷酸文遞鑑
閃閃落涼穗程禹山虞卿望海潮曰荒城寥落空林蕭
瑟愁中幾度年華金粉多情朱顏易老相思已付天涯
何處響悲笳況野雲戰壘腸啄飢鴉玉碎香零一川狂
浪捲桃花驚魂臉暈晴霞認離鸞破鏡識字嬌娃高柳
眉絲東風賺絮無端墮落誰家幽怨訴琵琶但夢中掩
泣輒語咨嗟無奈啼鴂暗將心事寫箋麻方金門滿江
紅曰煮鶴燒琴如此事最爲可恨說甚麼書生戎馬大

官軍政輟櫓未能休惜玉銷兵已後仍分鏡問蒼天何
罪復何辜紅顏命嘔不出宵中憤按不住腰間刃把奸
人頭斷我心方稱萬劫不消精衛感再生那見鷺鷥並
只空空魂夢說情長人誰信此外金子石張子澣江少
泉汪泳泉金手山包慎伯吳定生潘篠庄江子珊馮七
雨談蓉庵汪榆谷閩秀熊澹仙李雲扶女冠福慧皆佳
駢體文以顧雨亭佳

襄鄖感舊圖二前圖乍遇汪惕齋圻作後圖入夢周琴
生序作蓮姑小象江秣山會作

余二十五歲鄒荔軒爲余寫小象於兩湖節署後程麗

笙臨於紅蕖館四十四歲嵇筠谷寫小象於倚虹園二
象合爲一冊題曰故吾今吾圖

題句佳者周綺村曰偶值告凶園可指半因愛客債無
端石舒薰曰邑小無才容我放交深翻恨見公遲顧月
巢曰一時覲面渾如舊衆口稱賢不獨予凌蓉渚曰芳
筵夢繞秦淮月驛路碑鐫楚塞勦馮七雨曰當年功績
留三楚此日詩歌壓六朝姚古鳳曰從戎一洗書生習
此事隨園要讓君繆子嘉曰九度華筵羅衆士萬間廣
厦庇群賢吳玉田曰卅載聲名傾趙勝一朝湖海識元
龍吳介卿曰封侯萬里尋常事原是將軍座上賓江立

亭曰十年戎馬空留績萬口飢鴻尙感恩交愈增多名
愈重今吾還北故吾尊吳竹亭曰少日文章空倚馬壯
年事業尙雕蟲莫傷仇覽功名晚猶見終軍劍佩雄江
素山曰庾信文章猶作客孔融家世尙依人金鉞蕉曰
到處有花皆入詠拈毫無字不生香金鶴船曰才人雅
愛何平叔友道誰如范巨卿石蔥佩曰鬚髯知從今後
改襟懷還與昔時同朱漱坪曰善佐畢誠成偉略不封
李廣信前緣只今未盡凌烟閣冠玉依然貌若仙康瑞
伯曰陸機洛下多新賦庾信江南有故關石芸亭曰風
高幕府千軍頌感切蛾眉百口生江心止曰春遊徧著

東山屐秋謫常開北海樽歐陽棣之曰軍中百戰歸帆
穩石上三生旅夢孤徐珠浦曰快園烟景江東勝弱冠
文名海內知鄭棣原曰馮唐壯歲名成夢杜牧揚州鬢
易絲鄭嶸洲曰仗劍終軍懷膽略渡江叔寶擅丰神沈
東岩曰蓋代詞華誰抗手英年韜略早羅胸楊蓉仙曰
風前雅度圖中影到眼分明李白三鄭任堂曰千金投
贈尋常事想像當年解橐時楊芷林曰才如穎士奚奴
愛詩近香山老嫗知沈酌亭曰戎馬縱橫懷壯志乾坤
瀟灑寄閒身胡雲渚曰花箋乍拂詩腸熱草檄將成敵
膽寒汪逸園曰不獨文章能蓋世運籌誰敵此儒生沈

閻仙曰罕有書生能戰陣從無才子不英雄僧煮石曰
百萬金隨雙手散千秋名讓一肩擔

此外或長篇或詞不及擇錄者王晴岩范藥仙汪芸巢
沈雙溪于秋渚保印卿洪介石孟貞友樊問齋石澧原
吳香湖管靜庵沈素芬吳定生符雨岩周寶夫徐生庵
周琴生徐雪門徐蘭圃保鳳墀吳鑾坡吳飴亭顧玉沙
俞四香陳小伯吳素卿張義河孫秀江王雪齋韓劒泉
汪篠漁虞星塘閨秀熊澹仙吳筠齋李雲扶

余詩文不稿亦不點竄每遇卷冊振筆直書惟於磨墨
時構思故人不覺多傳爲宿構客東亭水月庵時黃楚

橋辰刻見訪攜編年圖十六冊索題余分古近體詩文
詞題徧與之甫過午耳游霜旬叢罕山款飲竟夕酒後
出編年圖十六冊索題余挾之歸舟用古近體詩及詞
題畢始寢次早復爲文序之持詣叢叢猶未起示圖愕
然此皆借速驚人之術非關學問也李小白贈余曰腕
有風生疑鬼助才如雲湧耐人思余和韻荅之曰詩非
矜速圖藏拙文不求深省費思

余生平朋友一日不可離因病不能訪而疏之詩文詞
曲著高人許因貧不能梓而棄之因有句曰太嫌求友
天教病不合詩自取窮

青溪小姑祠祀女仙甚莊嚴服御皆后妃物有士見而
疑之題詩於壁曰聞說青溪是小姑如何鳳袞與珠襦
蔣侯死後尤通顯擇得君王作爾夫寓宿祠中是夜夢
宮粧美人曰妾陳宮張麗華也有人憐妾之死肖像祀
於小姑祠仍其名者恐犯隋忌也青溪小姑已隨其兄
蔣子文姑鍾山矣士寤又題壁曰陳殿隋宮總化塵雲
裳霞帔尙如新青溪水接胭脂井合有靈祠待降神夢
感仙靈事有無神光香澤尚饌餽雙眸自慶多遭際親
見千秋絕色姝有人愚而癡聞其事每涉遐想適越過
苧蘿村禱而宿於西子祠冀得一覩果夢一醜婦曰妾

東家施也西家施偕范大夫游五湖去代其守祠在此
既蒙惠顧當效繾綣其人驚避而醒每語人曰人言西
施美不足信予於東家施見之矣聞者噴飯

余與吳蘭雪舍人嵩梁飲桃花庵僧善田乞聯吳書上
句曰書臨貝葉經都韻余對曰居有桃花佛亦仙

朱培五名景福號副農工醫好義余在邗上見其詩佳
句甚多尤工排律最愛其咏雪美人曰玉質生輝貌罕
倫天風吹下散花人不將水性疑冰性聊借香塵襯玉
塵未肯讓梅爭絕色可知爲雨是前身青娥耐冷嫦娥
寡合向雲階作近鄰

陳書農名宗選甘泉諸生品學並重多長者風所居淺
齋賓至如歸詩有專集其過東軒曰喬木鬱春氣墟煙
散晚晴此閒多古趣空外到江聲拍手花時墜會心鳥
一鳴藤床今夜宿芳草夢中生有懷曰箇人雙鬢已成
絲曷不歸來醉論詩一尺魴魚三寸韭江鄉風味杏花
時警句如用杖曰幽尋好伴吟人屐薄醉疑扶侍妾肩
落花曰尙沿幽徑尋香夢賸有芳心戀故枝瞥眼春沉
流水外銷魂人是倚欄時

旋劒亭名鉅號三橋江都諸生善書精醫卜慷慨尙義
其涼州詞曰桃花楊柳映城樓無限春光馬上浮此日

玉門關外暖如何仍自號涼州對菊曰瑟瑟西風萬木
愁窗前宿雨未全收丹楓半落黃花放一樣天心兩樣
秋警句曰燕來春有信人去月無情夏至日行北潮來
水向西山深容月到風定讓花閒

快園詩話卷七

江寧 凌霄 芝泉

蒲塘幽夢乞詩圖琴學耘標作姚古鳳作記甚詳記曰
嘉慶乙亥冬凌子芝泉自金陵來時吳子隨山已去世
半載矣其子二泉出遺象索題作四斷句應之同人咸
稱奇作也明年正月五日吳之友姜子琴南夜夢隨山
衣輕裘揚揚然來大聲曰朱八負我朱八負我我有尋
詩圖曾屬其代求名下士題之今芝泉先生至朱八與
之交且密何絕不齒及耶且吾幕天席地圖陳子柯山
已命吾兒丐題於芝泉何朱八不如陳之戀戀有故人

情耶吾素善子子又朱八契交也盍爲我言之語竟長
歎數聲去姜驚寤床頭一鐙綠如豆疑悸不復成寐先
是隨山游越歸作是圖藏之篋沒前數日袖以授朱漱
坪諄諄相委姜不知也亦并不知芝泉已爲其題幕天
席地圖也晨興亟詣朱脩述其夢朱惛然曰吾誠負吳
匹負吳四矣今其靈旣來切責烏可復遲遂偕姜及陳
柯山洮古鳳挾圖至紫薇道院告於芝泉芝泉亦異之
古鳳曰吾聞鮑家詩好鬼唱秋墳又賀監謂太白曰子
詩可以泣鬼神矣非芝泉之聖於詩無以感隨山之靈
而隨山塵夢已醒猶拳拳風雅才人結習至死不除亦

可悲矣因語季子學耘繪圖以紀其異慙芝泉賦之芝
泉曰卽以幽夢乞詩名圖可乎子盍記之古鳳遂濡筆
作記書於冊右

石蕙佩曰吳子癖尋詩遠邇無弗屆游蹤徧吳越逢人
索詩債一朝鶴背跨高吟入仙界仙界樂固多人間才
可愛爰入姜子夢丁寧作情話爲言凌參軍聲華壓當
代生前苦無緣未得騷壇拜幕天席地圖題咏我心快
好句多益善得一何妨再朱子已遺忘此圖汝是賴若
問乞者誰九原一詩丐語罷風有聲窸窣窗紙背其二
曰凌生蒲上游早脫半年屣吳子修文名暫緩半年死

傾蓋如訂交相契當何似風雨夜聯床天涯得知已珠
玉競紛投旗鼓勁相抵一篇又一篇互索曰無已如願
以相償易如臂使指奚煩羨與朱展轉求之子其三日
離合有定數人鬼途各歧獨此翰墨權非天所能離元
元談道旁黃葉吟水湄縑酬韓生畫墳唱鮑家詩幽明
同至性不因生死移索詩入友夢委婉情愈凝世人好
吟咏夢夢昧良師有才不知愛交臂多失之對此夢中
魂毋乃愧且悲

鄭耳山曰碧落九黃泉九已往詩家無不有生人欲求
不可得所幸隨山已死後何不攜此尋詩圖乞題宋之

范陸與蘇黃唐之元白與韓柳宜乎非往蓉城白玉樓
卽當直達幽都才鬼藪胡爲上天下地俱不尋仍然久
于鄉關走想渠遺世半年餘詩鬼詩仙皆尚友曰與古
人談今人現在吟豪數誰某同聲共稱金陵凌風雅叢
中獅子吼詩星正照蒲水東豈可失之腋與肘急呼鬼
車歸去來不知此圖已題未題否圖未曾題心不平微
朱君責將誰咎歸咎於朱仍託朱緩頰轉煩姜子口此
夢固甚奇此事更非偶請爲隨山別繪一圖傳不朽先
生大揮飛白帚先生重傾才八斗題尋詩圖語旣超題
乞詩圖意尤厚隨山必袖此詩上天下地去歷歷呈之

諸吟叟送與先生兩師觀弁山尚書應俯首倉山太史
應歛手

鄭伊曰快園公子騷壇雄一枝椽筆揮生風弁山倉山
得衣鉢香名久已盈江東忽爾扁舟來蒲塘蒲塘共識
黃文江來鶴軒靜設吟坵少長爭登翰墨場誰知才名
動幽寂信是詩成神鬼泣隨山吳子本詩豪昨歲修文
仙界列幕席遺照公已題尋詩一圖求轉急央友魂馳
語絮煩姜子夢醒陳歷歷先生慨然贈新詞幽明直可
成相知轉笑秋墳鬼空唱鮑家詩何如吳君耽吟咏死
後癖較生猶癡得公錦句輝泉臺泉下定多詩魂來共

爲吳子慶爭道先生才吳君把卷亦必狂且喜狂語地
下諸同志隨山獲此奚替生隨山從此可以死

李雪齋芳梅曰騷壇推獨步南國久知名不道詩千首
還能動九京辭工原泣鬼夢短倍牽情念此斯文脉何
曾判死生

姚鸞曰詩人癡絕愛尋詩尋著詩人面乞遲夢醒不妨
重入夢愛詩誰似此人癡其二曰襄鄖舊夢感前游又
爲吟魂慰隔幽搖動生花一枝筆九原才鬼盡低頭
姜圻剔銀鐙詞曰想是修文已畢又動愛才癡癖未散
幽魂來呼吾父說把詩人尋得夜臺路隔未敢向門墻

親炙夢境纔經說及引得先生感泣白社酬吟黃泉拜
賜也此醯從鄰乞秋墳月夕好聽唱才人新什

吳玉田冒紆南各文一篇姜琴南四言朱漱坪五十韻
吳竹亭五古黃楚橋江立亭喬雲客孫蔚原鄭茗仙吳
香湖楊蓉仙皆七古傳柳橋三體陳柯山五排黃佩芸
五截范藻仙六截沈素芬楊芷林鄭健堂皆五律鄭棣
原何涵川屠西園李瘦仙汪筠溪皆七律陳小伯汪月
樵王鶴汀談蓉庵俞四香周調梅姜種蘭張晴川王閭
風沈希倫吳鑾坡鄭嶸洲沈東岩吳飴亭皆七截汪逸
園李琴軒皆詞

余題圖二首之一曰披圖不覺淚滂沱知已平生感太多三載交游徧東海一朝賞識到南柯新詩聽唱秋墳鬼異事爭談春夢婆轉使羈人增愧赧已謫難對九原歌

以上歷舉各圖詩以紀友朋之盛今余病處一室不能與之交游良可憾也曰惟著書時令兒子鈔謄著書三年一切服食皆朋友所贈八口之家得免凍餒者友之德也列在五倫蓋有以哉余有句曰鎮日讐書惟子伴遠方樂事是朋來又句曰最感多情鷗鷺侶分餐爭活信天翁以詩交者膠漆相投宜矣亦有從未談詩而屢

被其德者如東亭之方茂堂西園之王紹川是已自和
有句曰犬抵盍簪因義合豈寧贈紵爲詩來

方子雲先生有東坡之癖喜談鬼嘗曰人鬼每相反人
陽之靈曰見夜隱鬼陰之靈夜見日隱人以輕爲健鬼
以重爲健人自小漸長以至於大始有童子冠者之別
鬼自大漸消以至於小乃有新大故小之說無百歲之
人有千年之鬼人一日不可缺三餐鬼有終歲不得三
餐者鬼三餐謂春祭秋祭冬祭也先生有句曰說鬼鐙
前風牖紙悽人枕上雨淋鈴先生詩多言外音曾有句
曰思婦空庭艷艷花羈人孤館昏昏雨

周健翰沈香谷賭作鬼詩周曰紅袖雙垂雲髻聾荒園
對月悄無聲沈曰青艸白楊山徑冷靈衣風動出來遲
沈有題畫句曰茫茫大海絕風塵但見蓬萊色色真只
道學仙都到此原來山上竟無人

俗傳試闈中有鬼雖難盡信然可風世一士子書卷上
曰芳魂飄泊幾經年今日尋來矮屋前襪汝功名汚我
節當初錯認是良緣又一士書卷上曰一元莫道歸前
定十載須知有舊冤如海恩情猶若此他時富貴更難
言二詩足爲喪心負行者戒

徐朗齋錄慶初名嵩崑山人三場時因宿妓家誤點朱

入主司以其文爲元求策不得乃刊其文於解元之前
不刊名而刊坐號曰麗六徐句曰芳名麗六流傳徧下
第江南第一人後雖中而非元矣副貢與正榜認同年
始於崇正初年前所未有

門人中以快園圖乞詩者佛寧安執經圖姚鸞授硯圖
韓淦貧筴圖姜圻虞步廣皆問字圖鄭伊汧照皆立雪
圖惟題鄭生圖詩未入集姑記於此詩曰風雪連朝閉
小閣何人相訪到蓬門書童報道停車客半載詩囊半
酒樽蒲塘千里接秦淮寒水征帆幾日開姜小琴同姚
小鳳可曾相約一齊來愛君家學本精微詩理康成得

指歸雅合葩經經裡句來時雨雪正霏霏雪花如絮染
青衿爲問堦前幾尺深笑指滿園桃李樹枝枝轉眼變
瓊林

余年十五大母放賑制府餽聯曰好施不藉同心助餘
慶良由積善多

余病後族有迂老人聞各友厚余大奇之浼人不遠數
百里訪得其實作謠勒石於祠曰芝泉旣得疾所賴新
交密雖當貧困日朋友不可及東亭關欣戚蟻浦每濟
急蒲塘慣助力邗上衆林立梓里悉和翁古豐得三益
崇川才莫敵海門賢士集雉皋能分席南沙心畫一東

海經歷畢人人知愛惜江南族多瘠聞之但感泣作謠
 勒以石祠中紀游迹語語皆樸直八二衰老筆乃揚本
 裘卷乞人題咏余題四截其一曰京江丈者太情長勒
 石祠中善表揚友好竟如三鼎甲東亭蠙浦與蒲塘老
 人得詩不當其意屬註各姓余遂以五截題後曰友在
 人倫內公何太好奇今將編姓字只恐不成詩自愧為
 遊客人緣到處宜恩多應折福賦此感相知東亭誰最
 良金氏詠堂石渠共蘇雲巢竹君姜一種蘭周西岑琴生
 繆澹書吳沂泉素卿姚亮工麓樵外栽培更有方茂堂
 三亭蠙浦最沈素芬繆潤亭並吳竹亭江立亭子珊松

椅
鹽務諸君子

汪映嵐洪穎書方菊如方花農余尚章

程山溪程湘帆江笠人

高懷實寡雙佳侶徧蒲塘

柯

山姜晴南小琴

石蕙佩沈

禹東松園東岩敏夫楊芷林

落仙姚蓬邨小鳳吳

玉田香湖節亭顯文鑿坡二泉

朱

漱坪冒

璞原

季學菴

鄭氏

棟原茗仙嶸洲耳山竹堂

更

情長邦上張

老蘊

黃

春谷

許

春卿

交深二十春群公將

百數最久舉三人梓里交諸沈

約華殿魁密庵蔭秋希

倫蔭嘉文梁澤民星澗

扶輪首酌亭墨庵椿圃外錢老

廷謨

眼能青古豐汪

春田春潯

最久義重又三徐

珠浦

雪門蘭圃顧老

咳吟

兼吳

蕉衫

葛

晴嵐

周旋世莫如崇

川徐凌萬文修紀雲戴承高楊蓮滑馮七雨春谷李雪

岩元朗邵芝臺明榮堦王閭風雲峰碧池燕鎬稼蕃慶

謙蒞陵晴岩胡雲渚顧玉沙月巢孫秀岩秋浦南珊儀

堂瀛洲張品南孟民族谷華孟傳樊次求成步章劉銘

勳宋六雨汪孟芳天池仙渡馥堂方秀山守尉吳竹筠

山長獅阜客周琢亭沈景南錦和顧吳成雨景倪朗屏

程在田楊冠山陸庸庵施雲坡陳衡甫季汝陵秦南江

孫雲堦意不輕雉皋徐蓉湖生庵與冒妙隱村南水雲

筠壑琴石胡春岩雲溪范葉仙曉園漱環懷勲石書勲

芸亭新泉喬雲客黃佩芸孺子羅綬來卜漁艇陳拙齋

牧村春軒佩蘭朱岑灣顧春華宗蕙亭劉味石錢介三

蔣俊升張呂溪茗海先諸經湘洲網裁景瑤伐亭及子

卿胡酉香汪純也于秋清石澧原沈子容晉接總多情

新地還餘李蔭環曹橋更有朱冠虹雨林叢罕山碧海

爲霜甸冠趙雨峯是馬塘儒中結吳陵契鄒耳山儲晚

嵐仲雲浦林庵夏紅舫王左亭沂中鍾竹椽康瑞伯羅

夏園古軒子方外揭亭又徐竹薌常繼香邂逅在中

途情偏格外殊王西園紹川會於何塚潘時堰可漁會

於東亭陳商邱小伯會於何塚李馬塘心陶會於掘港

吳門蘭谷會於揚州沈崇川贊府莫波會於白蒲余興

化莢庵會於揚州宋安邑之山會於揚州顧三里樓謁

士會於白蒲吳門雨亭會於揚州劉旌德臥松會於揚

州丁堰湘浦會於霜甸吳全椒山尊會於揚州甘泉橋

樗會於枞茅歙縣才甫會於揚州僖通州刺史陞河南

太守敬亭梁海門司馬研溪掘港鹽尹湘屏劉崇川遊

府梅溪尙狼山總鎮守聞福泰州游府涵亭何東臺大

令涵川趙如皋大令壽莊戴別駕貞石陳瓜洲司馬曼

生東皋大令陶圃王司馬春圃小汀大令晉川周江都

大令寄庵傅如皋二尹柳橋閻如皋分尹誠齋徐東亭

分尹秋槎費東臺少府甘泉韓何琛鹽尹曉岑程豐利

鹽尹叔濤沈拚茶鹽尹桂亭白儀徵鹽尹坦庵汪海門

贊府再山東臺鹽尹月樵客裡遇同鄉關情得味堂

廣文扶持龔星樵守尉與寇坦之守尉推薦有歐陽康

之孝廉回首憶安豐程魯山潘篠庄胡淞亭蔣詠春洪

蔗畦石鐫東海事惜未載其中選社結真州金可亭張

少蓮汪綠莖與邱白人玉如程詩筆健喬梓二賢劉外

禮吉林蓮社交邦上方華並曙開道峰何阜佳自拙雉

舉來力從遙處助氣向暗中吹感謝憐才意靈臺一寸

知最洽平生友天涯繫夢魂汪玉屏江素山羈遠道梁

德圃

佛寧安

在都門落落晨星散洲邊又水邊程天長

禹山淮安蕤香素桃源玉堂屠山陽西園宋高郵綠洲

輩周氏丹徒實夫時也及陳甘泉書農旋江都劍亭淚

落由吳介卿甚徐詠堂程曙蒼陸硯農鄭栢里汪元波

胡丙皋冠海王桂岩陳克江石泉戴雨峯蔣秋竹洪介

石繆竹癡許蔬庵素嘯竹張竹泉筱軒蔚堂十載交游

處承投綰紵多五言書不盡負德定遭訶十中遺四五

平仄韻難填恐再添新雨留為續後篇有同姓未盡註

者如東亭之姜春舫蟪蛄之吳子安皆留續餘倣此老

人復勒於石

快園詩話卷八

江寧 凌霄 芝泉

畢秋帆師女智珠字蓮汀著遠香閣集其唐明皇打毬
場詩曰廣場百尺紅欄護三郎沈醉打毬處一自漁陽
戰鼓來便從棧道聞鈴去桂桓年深不復完牧童樵客
日盤桓雨餘苔片平於掌春暮楊花濛作團

桐城姚公女韻蘭名素適淮安程公子賢能工詩咏月
季花曰菊傲寒霜梅傲雪此花偏占四時多餘見後
程山溪母張太孺人淑惠著茹茶詩草節母也題蒨薇
詞滿庭芳曰堦下蟲鳴窗前月暗挑鐙捧讀新詞鏗金

曼玉字字斷吟髭愧我才非咏絮花間譜未奉明師況
秋老多愁多病拈筆幾回遲聲名傳已徧揮金好友賑
米賙飢早龍門拂塵虎帳談詩好箇翩翩公子青雲路
拭目相期須努力金門射策奪取鳳凰池

吳竹亭妹玉芬字筠齋與諸兄弟賦餞菊詩各隱其名
謄錄以質余余戲取菊花狀元則筠齋詩也題故吾今
吾圖曰髻齡課讀賴萱親壯負奇才迥出塵投筆請纓
荆楚地最佳戎服稱儒巾九度筵開憶昔年今從海上
結詩緣敦槃孰作騷壇主畢竟風流讓謫仙

如皋熊淡仙璉夫姓陳有奇疾字後夫故依弟而居詩

卷飄零家貲散盡余贈句曰詩似謝家風裡絮錢如天
女手中花贈余沁園春詞曰公子多才儒兼武略名重
士林曾十年戎馬謀參帷幄三秋風雨詩寫蕭森掃蕩
功成登臨興健詩示奇山到處尋休孤負恐韶光易逝
潘髻霜侵交游散盡黃金儘放眼蒼茫空古今記廣場
高曾樽前俠氣哀絲豪竹醉後狂吟旅燕無家朱門非
舊回溯生平百感深行蹤過悵寥寥塵海幾箇知音余
以原調贈之曰百折千磨而今信矣天挫與才看新詩
百首金敲玉戛清詞幾卷月鏤雲裁刻骨情深填膺恨
滿都入毫端化作哀難知事是梅栽枳棘蘭種蒿萊沈

吟無限低回。展觸我紛紛憂思。來歎飄零。鵲面空歌吳市。支離駿骨難售。燕臺命薄。途窮同聲一哭。碎硯焚書。理竟該他生。願變癡兒。駢女再轉輪迴。淡仙爲余撰滿。薇詞駢體序文一篇。題感舊圖七古一章。七截一首。滿江紅詞一闕。閨秀中余見倚馬揮毫者。淡仙之外。通州鄭冰蟾而已。

蟻山李雲扶靚。父母皆故兄。久外幕及年。未字訓蒙。自給題感舊圖。滿江紅詞曰。慘矣亂離。憐嬌小。遇人不淑。纔幸得恩公提挈。依然完璞。何苦餘生懸虎口。旋教薄命歸魚腹。問百般護惜。是誰行居。帷幄塵劫。滿危機伏。

幽恨切夢魂屬竟才貌雙雙良緣難續若使遭兵身早
殞那能展卷人同哭到如今感舊有新篇難終讀

余幼年寄內詩曰昨年書信寄來時曾爲開函一展眉
寂寞旅情勞慰藉零星家事賴支持加餐堂上知逾健
弄果兒行定解嬉我住衙齋幸無恙不須終日繫懷思
憶昔恩恩別恨添片言忘屬爾休嫌改成詩稿藏文匣
戲匿花鈿在鏡匳少要彈琴傷指爪常須搜蠹檢書簽
家人旅卦爻皆吉不用金錢兩地占莫放春寒入小軒
春寒料峭不勝言月如久玩衣須厚香若濃熏被自溫
戒採新花防露氣休因閒事斂眉痕何嘗千里雲山隔

夜夜相逢有夢魂問余何日返歸途春盡爲期斷不誣
單袷衣裳休再寄塵汚窗壁可重糊前番小病全痊否
幾度音書總到無只恐還家慚對汝空囊仍是故狂吾
內子丁佩蘭能詩而無可錄句故以此詩代之非以余
詩雜入閨秀中也

長女志珠性敏善屬對延李製桐舅氏課之長喜吟咏
其快園晚步曰月轉迴廊人獨立花圍小閣燕雙栖落
花曰餘香自許留庭院小影猶能入繡絲余寄女曰儻
寒應替娘溫被每晚須催弟背書又曰鍼線切毋荒妹
課琴棋都可散娘心

顧蓮姑余不知其能詩也及去後節署中爭誇其詩片
紙隻字故不我與乃使人於房邑尼庵覓其手跡得綾
幡一挂上有小楷繡一詩曰金鍼日日繡蓮花繡出蓮
花獻科迦但願銷除兵燹劫來生免得化蟲沙字倣靈
飛曩所見慣的其所書詩則不知是其自作否也

泰山墩有無名女史九日題壁詩曰霜葉紛飛石磴埋
登臨蹴損小紅鞋西風不帶天涯信見箇征鴻也放懷
荆榛勾絆畫裙開小妹身輕先上臺聞說登高能避阮
悔教夫壻不同來

傍花邨看菊壁上有詩曰轉轉疏林曲曲籬惜花人至

怨花遲如何行徧青徐界不見重陽雨一絲黃河北去
捲風沙幾日長淮水是家畢竟揚州真福地闔邨田畝
盡栽花莫將憔悴感秋容未必黃花瘦似儂自是客懷
疏嬾甚不從湖上看芙蓉繁華終古屬揚州多少閒情
託好秋隨處種來隨處賣替花歡喜替花愁籬邊游屐
太紛紛若道看花豈盡真不是女兒無避忌異鄉且喜
盡生人邢江轉旆卽吳江欲別花前意怎降買得一肩
歸去晚愛分秋影上蓬窗山左露芬女史冉夢薇題
秦淮妓王翹雲光艷動人余會詩招之來王不能古體
是日近體爲送春王詩曰催歸聲裡放將離欲問東君

何所之決志不留虧爾忍斷腸相送笑儂癡綠窗風雨
心擔久紅豆簾櫳夢醒遲歲歲香車南浦外小魂銷盡
有誰知衆送春詩成互錄以示翹雲令定甲乙王首愛
余奢念妄思三月閨及餘花雖豔爲誰容之句次則李
瘦人似燕自來還自去笑余能送不能留老眼已無分
手淚香闥應有斷腸人之句時李年將八十喜遇知音
手舞足蹈翹雲避之余秋農戲咏其事曰酒人臨水開
詩社織女穿花避壽星

翹雲年十九有司馬以八千金購去攜之官舟泊漢陽
之黃花洲夜遇盜以被裏翹雲去餘不失一物時余客

漢陽郡齋有戚蘭莊者扶乩得秦淮王翹雲駢體一篇
七截二首人皆疑爲明妓爭咏其事余亦作翹雲曲中
有句曰誰知情女離魂事竟是司空見慣人末句曰何
時歸棹紅樓泊細叩分身聶隱娘次日司馬被盜之報
至

秦淮妓張倩紅人比之璞玉張蠡秋外翰曾虔詩弟子
也著繡餘吟其一半兒詞曰羅衾難耐五更風欲起披
衣體尚慵臨鏡羞看兩鬢鬆撥黛籠一半兒香灰一半
兒紅妹倩雲亦殊色咏白蓮曰小婢笑從池上指六郎
傳粉效何郎

秦淮妓馬友蘭字芸卿曾畫桃花寄所歡題詩於上曰
生長綏山骨本仙塵凡小謫倩誰憐未隨流水原耽隱
偶逐東風便鬥妍溪上紅濤翻灼灼竹間翠袖倚娟娟
錦城三月春如海笑破香唇又一年輕薄休教並柳枝
侍香曾見讌瑤池只因露面迎崔護未許無言效息媯
稚燕雛鶯嬌共惜狂蜂浪蝶想休癡夕陽一片亭亭影
倩女魂銷若箇知雙槳爭迎渡口春略沾雨露便精神
游來前度題詩客喜動芳年待字人粧閣梨雲參入夢
離亭柳影佐含顰仙郎儻憶胡麻飯須記天台好問津
一從春去怨殘英紫陌紅塵別恨生此日門中應憶我

何時洞口再逢卿。劇憐醜面風華好，不覺驚心月令更。
惆悵深潭千尺水，瓊瑤未報故人情。

秦淮妓侯桂林字月娟與俞種芙善，俞有美名，侯調之曰：「共驗新粧，向鏡臺鏡中雙臉笑，相猜與郎一樣神仙骨。莫是蓮花化得來？」妹雙琳有與施二郎服鳩事。張蠡秋爲譜，麴香記傳奇余題句有曰：「煩君多鍊媧皇石，盡補人間離恨天。」

余與江雪舫方以虛飲秦淮妓王雙紅家，先是雪舫以紅樓夢書贈王，值王夜飲，方調江曰：「拚酒客圍紅燭，暖送書人坐黑窗。孤雙紅笑曰：『何不改獻書人立黑窗。』孤

似有風味其小姑朱秀芳尤慧熊晴櫺戲謂曰秀色可餐秀芳應聲對曰芳心自警

女尼福慧年十六親故無依豔其色者衆畏而皈尼自愛其髮不忍落年二十二其師強落其髮性愛詩詞卽以其髮選余詩詞繡之其題感舊圖一萼紅詞曰甚因緣這佳人才子天竟不成全賊匪驅來奸邪騙去悲歡離合徒然直盼到身歸幕府已居然閬苑作神仙幸脫沙場還辭金屋仍赴黃泉若論庵堂小住繡長幡供佛佛也應憐不渡愛河偏沈禍水無端凋謝青蓮賸下了情根未斷夢魂中哀語訴纏綿可惜傳奇一本少箇團

圓有自遣句曰小謫紅塵二十春鐘魚曉夜作勞薪只
因香閣攻書慣誦得楞伽字字真遺體愁傷父母恩雲
鬢不翦入空門一般仍把金鍼弄拋却羅襦繡布幃西
方三十六蓮花得證無生也不差聞說佛心空色相如
何肯度女兒家我師戒我苦修真成就金剛不壞身修
到無愁無樂日非仙非鬼亦非人又向曰萬籟秋深總
瑟然最難調護授衣天山居那復知寒暖抱得閒雲作
絮眠禪床睡起坐雲房手弄牟尼自忖量止水心情誰
解識七條絃與一鑪香

有妓哭節婦詩曰自慚余有淚敢謂世無人後飯尼詩

曰謝却花鈿洗淨脂有心聽講又生疑但知誇說青蓮
妙留蕩還牽不斷絲昔年弄笛更吹笙習出歌喉字字
清今日誦經依法座遏雲聲變海潮聲春花秋月過恩
恩不問時耕澹與濃夢裡閑千休下淚雲堂喚醒有晨
鐘繁華寂靜了前因嘗徧酸辛廿五春如意珠能修到
手不生西土不紅塵是人二十後皈尼法名了因前之
姓名深隱珍玩俱棄惟一對聯不肯離側對句曰立近
晚風迷蛺蝶坐臨秋水亂芙蓉字亦無甚奇處

女尼韻香居雙修庵能畫蘭工小楷名流過錫山者多
訪之有求其一見而不可得者嘲之曰仙人居處號雙

修不許蓮花開並頭福慧果然修得到江南名士一齊收

丁曼仙題快園詩話曰焚香三復語清新友誼師恩記
逼真人共鑄君爲賈島君今又鑄鑄金人得作乾坤不
朽人此生何幸與君親分明千佛名經在一朶蓮花一
法身